


Háteigur



20. árgangur 2. tbl.

VIRÐING – SAMVINNA – VELLÍÐAN

29. febrúar 2016

Förum varlega í umferðinni

<http://hateigsskoli.is>

Frá skólastjóra

Ágætu lesendur

Nú er byrjað að huga að næsta vetri í skipulagi skólans. Skólaráð, samráð skólastjóra og kennarafundur hafa þegar fjallað um fyrstu drög að skóladagatali fyrir veturinn 2016 til 2017. Innritun fyrir næsta skólaár lauk föstudaginn 19. febrúar. Þá höfðu 34 börn verið innrituð í skólann af þeim 76 sem eiga lögheimili í hverfinu og ættu að ganga í 1. bekk í haust.

Það olli okkur erfiðleikum í skipulagi á síðasta ári, hve seint við fengum upplýsingar um þá 1. bekkjar nemendur sem ekki voru innritaðir í skólann. Þá var svipaður fjöldi 1. bekkinga með lögheimili í hverfinu eða 75. Af þeim 75 voru 35 innritaðir í skólann en síðar komu 7 sem fluttu í hverfið. Nokkrir nemendur af biðlista utan hverfis voru síðan innritaðir. Þá var 1. bekkur fullsetinn.

Eins og öllum er kunnugt þá eru þrengslí í skólanum og hann rúmar í raun aðeins tvær bekkjardeildir í hverjum árgangi. Ef skólinn þyrfti að taka inn þriðju bekkjardeildina í 1. bekk yrði að gera breytingar á starfsháttum skólans til að koma því við. Nú nýtir leiklistin og danskennslan stofu sem hægt væri að nota fyrir þriðja bekkinn en það myndi setja þá starfsemi í mikla óvissu. Það er því mjög mikilvægt að vitneskja berist um þá nemendur sem verða innritaðir í aðra skóla. Við vitum að á hverju ári eru nemendur sem tilheyra 1. bekk innritaðir í Ísaksskóla og Barnaskóla Hjallastefnunnar, en koma svo oft til okkar í 5. bekk.

Unnið var að forsögn vegna viðbyggingar við skólann á síðasta ári. Þeirri forsögn mun bráðlega ljúka en þá verður gert hlé á frekari hönnun nýbyggingar fram til ársins 2017 að minnsta kosti.

Kennarar skólans skila nú inn upplýsingum varðandi næsta skólaár og vitum við nú þegar að einhverjar breytingar verða á kennaraliði en ekki er hægt að upplýsa nánar um það fyrr en að gengið hefur verið formlega frá þeim. Við gerum okkur vonir um að auglýsa síðari hluta marsmánaðar.

Margir vita að ég hyggst nú hætta sem skólastjóri Háteigsskóla og fara á eftirlaun og það tilkynni ég nú með

formlegum hætti. Skólaráð mun sitja fund með Guðlaugu Sturlaugsdóttur skrifstofustjóra grunnskólaskrifstofu SFS á næstunni til að undirbúa auglýsingu á stöðu skólastjóra. Ég hef starfað samfleytt sem stjórnandi við skólann í 25 ár nú í vor, þar af 19 ár sem skólastjóri. Ég hóf störf við skólann sem æfingakennari haustið 1990 og kom frá Grunnskólanum í Sandgerði þar sem ég var aðstoðarskólastjóri í 4 ár. Vorið 1982 og veturinn 1982 til 1983 var ég almennur kennari við Æfinga- og tilraunaskólann sem síðar varð Æfingaskólinn 1988 og Háteigsskóli 1997. Feril minn sem skólastjóri hófst er ég varð skólastjóri á Skjöldólfsstöðum á Jökuldal 1975.

Það er sérstakt að ég hef nánast allan minn feril verið skólastjórmandi. Þetta er orðinn langur tími sem ég er afar þakklátur fyrir og tel því rétt að fara á eftirlaun nú þegar ég get það. Ég mun láta kveðjuorð biða betri tíma en get ekki stillt mig um þakka öllum fyrir samstarfið sem hefur verið einstaklega gefandi og ómetanlegur hluti af hamingju minni.

Með hækandi sól,

Ásgeir Beinteinsson,
skólastjóri Háteigsskóla

Fegurðin í myrkrinu

Í myrkrinu hún falleg er.

Þá ljósin skína bjart.

En er dagur kemur þá ljósin dofna.

Og fólkið fer á stjá.

Úlfar Rafn Benediktsson, 9. bekk

Hugleiðingar um listina

Speglun, speglun seg þú mér

hvað á landi nettast er.

Því graff á þínum glugga

lætur mig hugsa...

Að list

þarf ekki að vera samþykkt list,

list þarf ekki að vera sorgar list,

listamenn þurfa ekki að sýna tilfinningar eða minningar

eða samkennd.

List er list.

Magdalena Schram, 9. bekk

Begar kennslustundir falla niður á unglingastigi

Um nokkurt skeið hefur undirritaður gert tilraun með breytt fyrirkomulag tilkynninga um kennslustundir sem óhjákvæmilegt er að fella niður hjá 8.-10. bekk. Það skal tekið fram að ef möguleiki er að fá afleysingarkennara er það gert, en ef um mikil forföll kennara er að ræða hefur það ætíð forgang að leysa málin í 1. – 7. bekk. Nýtt fyrirkomulag er eftirfarandi:

Nemendur fá SMS

Nemendur í 8. – 10. bekk fá sms frá skólanum falli fyrsta kennslustund dagsins niður. Þetta er háð því að upplýsingar um forföll liggi tímanlega fyrir. Smáskilaboð eru send til nemenda en ekki forráðamanna vegna þess m.a. að ef send eru skilaboð á forráðamenn fá allir sem skráðir eru aðstandendur skilaboðin. Það er ekki nauðsyn á því og að auki fylgir því aukinn kostnaður.

Upplýsingar á heimasíðu

Með því að fara inn á heimasíðu skólans geta foreldrar 8. – 10. bekkina og einnig nemendur nú fylgst með forföllum dagsins, ef einhver eru. Til hægri á forsíðunni er blár flötur. Þar er smellt á FORFÖLL DAGSINS og þá birtast nýjustu upplýsingar um þær kennslustundir sem falla niður.

Þórður Óskarsson,
aðstoðarskólastjóri

Skapandi samráð

Víkuna 29. febrúar til 4. mars munu nemendur í 6. bekk Háteigsskóla vinna við að smíða einfalt mól af skólahverfinu. Módelið mun síðan verða notað sem tæki til samráðs við íbúa hverfisins þar sem þeim er boðið að koma með hugmyndir um breytingar og nýja framtíðarsýn fyrir sitt hverfi. Samhliða módelismíðinni munu nemendur fá fræðslu frá starfsmönnum umhverfis- og skipulags- sviðs Reykjavíkur um skipulagsmál út frá leiðarstefjum hverfis- og skipulagsins um sjálfbærni og vistvæn og heilsu-eflandi hverfi. Vinnan við módelismíðina verður undir handleiðslu starfsmanna umhverfis- og skipulagssviðs Reykjavíkur í samstarfi við kennara skólans.

Þegar módelismíðinni verður lokið mun nemendum í 6. bekk gefast færi á að nota módelið til að koma að sínum hugmyndum um breytingar eða úrbætur í hverfinu. Í framhaldi af því verður foreldrum allra nemenda í Háteigsskóla boðið að koma og fá kynningu á verkefninu og nota módelið á sama hátt og nemendur, til að koma á framfæri eigin hugmyndum og framtíðarsýn fyrir hverfið. Sá viðburður verður kynntur sérstaklega síðar.

Hringekjan í HR

Nemendur í 9. og 10. bekk hafa farið síðustu tvo miðvikudaga í Háskólann í Reykjavík. Erindið er að taka þátt í Hringekjunni sem HR starfrækir.

Hringekjan er árlegt námskeið á vegum HR þar sem markmiðið er að kynna möguleika tækni- og raungreina fyrir grunnskólanemendum. Lögð er áhersla á að sýna þeim leiðir til að nýta tæknina til að skapa, leysa verkefni og öðlast frekari skilning á ólíkum viðfangsefnum.

Hópnum er skipt í þrjá hluta sem fara á milli vinnustofa – eina í hverri viku. Eitt skipti er eftir, næstkomandi miðvikudag, 2. mars.

Spurningameistarar Háteigsskóla

Úrslitakeppni Spurningameistara Háteigsskóla var haldin miðvikudaginn 3. febrúar.

Sigurvegarar í keppninni og Spurningameistarar Háteigsskóla 2016 eru:

Ásta Indía Valdimarsdóttir,

Guðrún Jóhannesdóttir og

Jóhanna Sigurðardóttir - allar í 10. bekk.

Þess má geta að stúlknaði hafa unnið keppnina óslitið frá 2012-13 eða síðastliðin 4 ár.

Í öðru sæti var lið frá 8. bekk: Arnaldur Goði Sigurðsson,

Axel Bergsson, Jóhannes Hrefnason Pálsson og

Steinn Kári Brekason.

Helgi Baldursson, kennari.

Húsdýragarðurinn

Mér fannst ekki gaman að vakna klukkan 06:30 til að fara í Húsdýragarðinn. Ég var svo þreytt að ég gat varla opnað augun. En þegar við komum þangað var það miklu betra. Ég var með hestunum, kindunum og geitunum og það var mjög gaman. Mér fannst samt ekki gaman að moka skítinn, það var ógeðslegt. Ég þurfti að halda á fötu, fullri af skít. Mér fannst skemmtilegast að vera með hestana. Við vorum að kemma þeim og vigta hey fyrir þá. Hesturinn sem ég var með hét Blævar. Við vorum líka með geitunum. Við fengum að klappa þeim. Þeim finnst best að láta klóra sér á milli hornanna, því þær ná ekki þangað. Svo þegar við vorum búin með nestið, þá fórum við að skoða það sem hinir voru að gera. Þar sáum við svín, beljur, minka, refi, hreindýr o.fl. Mér fannst mjög gaman í Húsdýragarðinum.

Elín María Jakobsdóttir, 6. bekk

Fiskileikar

Mánudaginn 22. febrúar fóru fram Fiskileikar í heimilisfræði í 8. bekk. Eins og margir vita, þá eru Fiskileikar samkeppni 8. bekkina um besta fiskréttinn. Nemendur fá fiskflak sem þeir eiga að baka í ofni með því kryddi, sósum, grænmeti og ávöxtum sem þeir kjósa. Þeir þurfa að búa sína uppskrift til og skrá. Þegar fiskréttirnir eru tilbúnir er kölluð til dómnefnd, sem Ásgeir skólastjóri, Þórður aðstoðarskólastjóri og Hanna Mæja umsjónarmaður skipuðu í þetta sinn. Niðurstöður voru þær að Djúsi var í fyrsta sæti. Nemó fékk viðurkenningu fyrir útlit og best uppsetta uppskriftin var að Ostafiskiaði. Tekið skal fram að allir fiskréttirnir voru góðir eins og ætíð.

Hér er verðlaunauppskriftin, Djúsi:

Eitt ýsuflak, bráðið smjör, 1 bátur af lauk, 1 bátur af papriku, 1 tsk. salt, ½ tsk. pipar, smá sítróna, smá ítölsk hvítlauksblanda, smá paprikukrydd, 1 tsk. chillisósa, 3 msk. rjómaostur og rifinn ostur.

Bráðið smjör sett í botninn á eldföstu fati, síðan fiskur í litlum bitum. Paprika og laukur skorið og sett yfir. Salt, pipar, paprikukrydd og ítölsk hvítlauksblanda sett yfir. Í lokin er chillisósa, rjómaostur og rifinn ostur sett yfir og svo inn í ofn.

Marteinn William Elvarsson og
Auður Elísabet Ó. Ólafsdóttir í 8. bekk

☞ Spakmæli mánaðarins: ☜
Allar góðar lífsreglur hafa verið skráðar.
Við þurfum einungis að fara eftir þeim.